

四庫全書

經部

欽定四庫全書

經部

周官總義卷二十六

四至

詳校官監察御史

臣

邱文愷

刑部郎中

臣

許兆椿覆勘

謄錄監生巨楊以灝

監生巨胡潮

欽定四庫全書

周官總義卷二十四

宋 易祓 撰

大行人掌大賓之禮與大客之儀以親諸侯

昔者成周之時待六服之諸侯則謂之大賓待諸侯之孤卿則謂之大客協其賓客之禮儀而往來乎諸侯之邦者行人也此大行人之職所以掌大賓之禮及大客之儀魯昭公如晉自郊勞至於贈賄禮無違者而叔齊乃曰是儀也不可謂禮晉趙簡子有及於

周旋揖遜之說而大叔亦曰儀也非禮也此禮與儀之辨然亦有不可以差殊觀者大宗伯所謂九儀之命則四命受器以下固諸臣之儀五命賜則以上則諸侯亦未嘗不謂之儀也小行人所謂九儀賓客之禮則朝覲宗遇會同固所以為君之禮存覲省聘問則諸臣亦未嘗不謂之禮也然而大行人之職必於大賓謂之禮大客謂之儀者特以尊卑言之若夫禮儀行於交際之間而誠意孚於禮文之表則先王之

所以親諸侯者一而已

春朝諸侯而圖天下之事秋覲以比邦國之功夏宗以陳天下之謨冬遇以協諸侯之慮時會以發四方之禁殷同以施天下之政

此六者即大宗伯所謂賓禮者也大宗伯以賓禮親邦國春見曰朝夏見曰宗秋見曰覲冬見曰遇時見曰會殷見曰同固所以詳其賓禮之名而大行人所謂圖事比功陳謨協慮發禁施政者又所以詳其命

諸侯之實所謂春朝諸侯而圖天下之事者若王制
言諸侯之朝而曰考禮正刑是已然事之作於先者
功必成於後又於秋覲而比之所以察其禮刑之成
二者見於春秋之時故因春朝秋覲而行之也所謂
夏宗以陳天下之謨者若舜典言羣后之朝而曰敷
奏以言是已然謨之見於外者慮必定於內又於冬
遇而協之所以核其敷奏之實二者見於冬夏之時
故因夏宗冬遇之禮而行之也所謂時會者諸侯不

奉王命而王將有征討之事於是會諸侯於國門之外而命以大司馬九伐之法自眚之伐之以至杜之滅之是謂發四方之禁以其時之不常有所以名時會之禮也所謂殷同者天子於十有二歲或未巡守於是諸侯衆見天子天子亦會之於國門之外而命以大司馬九法之事自正之等之以至安之和之者是謂施天下之政以其國為甚衆所以名殷同之禮也然而宗遇會同之禮亦或總以朝覲名者曲禮曰

天子當依而立諸侯北面而見天子曰覲天子當寧而立諸公東面諸侯西面曰朝鄭氏謂夏宗依春此圖事陳謨皆所以責其始又謂冬遇依秋此比功協慮皆所以攷其終故曲禮特言朝覲而經亦多以朝覲為主至於會同之發禁施政又同朝覲之時而行其禮故經亦謂之大朝覲此朝覲宗遇會同之名雖異而先王行禮之意一也

時聘以結諸侯之好殷覲以除邦國之慝

或謂大行人之言頰聘即下經徧存徧省徧頰之事
乃天子遣使以撫邦國諸侯者然大宗伯以此二者
為賓禮而此亦有大客之儀則知非天子遣使之文
其義則鄭氏所釋是已然鄭氏又曰時聘使大夫殷
頰使卿頰而使卿禮也聘而使大夫得乎左氏襄公
二十九年鄭伯將聘於周而鄭上卿有事子展使印
段往伯有曰弱不可昭公三十年鄭游吉如晉晉魏
獻子使士景伯詰之詰其無貳也游吉以為先王之

制惟嘉好聘享三軍之事於是乎使卿且援印段之事謂印段實往少卿也王吏不討恤所無也命少卿以往且不可而況於大夫之銜命霸主猶責諸侯以大夫行禮而況乎行禮於天子之庭春秋之時天子猶使宰若公聘諸侯而諸侯乃使大夫聘於天子大失尊君之義要之諸侯之孤若卿為大客是大國則以孤行聘煩之禮次國小國則以卿行之也

間問以諭諸侯之志歸服以交諸侯之福慶賀以贊諸

侯之喜致禮以補諸侯之裁

大宗伯之言賓禮不過朝覲宗遇會同聘類八者而已如禋禮之哀園敗反見於凶禮脤膋之親兄弟賀慶之親異姓反見於嘉禮蓋行人以親諸侯為主凡嘉禮凶禮皆親諸侯之意不以賓禮為拘也若夫間歲一問之禮又大宗伯五禮所不載特見於此經撫邦國諸侯之後其義則鄭氏所釋者是已以至歸脤賀慶雖本乎大宗伯之賓禮然大宗伯以脤膋賀同

姓異姓而大行人則一概以為諸侯者蓋大宗伯言其定制而大行人言其通制者也若夫致禴以補諸侯之裁則又通言凶禮之五者大宗伯之凶禮雖有曰喪曰荒曰禴曰弔曰恤之別而五者皆以哀為文則事雖異意則同鄭氏徒見夫禴禮哀圍敗弔禮哀禍裁遂總而言之以致禴為凶禮之弔禮禴禮其實則五者之禮皆所以補諸侯之裁也大宗伯之言禮亦可以類推矣

以九儀辨諸侯之命等諸臣之爵以同邦國之禮而待其賓客

九儀同邦國之禮而諸侯謂之命諸臣謂之爵者何也大宗伯言王命諸侯則擯小宗伯言賜卿大夫士爵則擯謂命者以策而命爵則賜之而已此所以為諸侯諸臣之辨然典命掌諸侯之五儀諸臣五等之命與此經若不合且上公九命侯伯七命子男五命凡三等而曰五儀者以公侯伯子男別之所以止謂

之儀此則亦以儀而辨諸侯之命也諸臣之爵孤卿大夫士凡四等而曰五等之命者以士之中有不命之士此之所主者爵所以止於四等也爵命不同如此而曰同邦國之禮者非謂舉其倍蓰不同者而同之也命同於上公則皆以九為節命同於侯伯則皆以七為節命同於子男則皆以五為節以至爵同於孤則皆以四為節爵同於卿大夫而有小國次國小國之異命則亦各祗其命之數而為之節以此待其

賓客則大行人之所掌有定籍而其爵命之上下隆殺各當於禮而舉不敢踰其分其同也至矣

上公之禮執桓圭九寸縹藉九寸冕服九章建常九旂樊纓九就貳車九乘介九人禮九牢其朝位賓主之間九十步立當車軹擯者五人廟中將幣三享王禮再裸而酢饗禮九獻食禮九舉出入五積三問三勞諸侯之禮執信圭七寸縹藉七寸冕服七章建常七旂樊纓七就貳車七乘介七人禮七牢朝位賓主之間七十步立

當前疾擯者四人廟中將幣三享王禮壹裸而酢饗禮
七獻食禮七舉出入四積再問再勞諸伯執躬圭其他
皆如諸侯之禮諸子執穀璧五寸縹藉五寸冕服五章
建常五旂樊纓五就貳車五乘介五人禮五牢朝位賓
主之間五十步立當車衡擯者三人廟中將幣三享王
禮壹裸不酢饗禮五獻食禮五舉出入三積壹問壹勞
諸男執蒲璧其他皆如諸子之禮

此經繼九儀而言即所謂辨諸侯之命者周制三公

一命衮謂三公八命加一命而服龍衮則為上公周公召公之分陝以之其餘則二王之後稱公建微子為上公是也按典命之職上公九命為伯其國家宮室車旗衣服禮儀皆以九為節此大行人所以辨上公九命之禮桓圭所執以為瑞者也縹藉所用以藉王者也冕服所服所戴以章身者也常者在天子為日月之大常此止名以常即所建交龍之旂而通稱為常樊與纓皆飾馬之物以屬飾之者也貳車後乘

之車也介則相禮者也禮謂饗餼之大禮也凡此其節皆以九其朝見之位分為賓主其間相去九十步而立於車轂之末謂之軹於是王行四十五步以迎賓賓行四十五步以朝王王於是使大宗伯為上擯以至承擯末擯凡五人擯而見之朝畢則有廟享之禮王受其享享必將幣皆束帛加璧庭實惟國所有公再拜送之其享必以三三享之禮既成乃以求神之裸禮禮之王酌鬱齊以裸賓后亞焉是謂再裸再

裸之禮賓有酢禮以象尸酢王與后之義以至饗禮
九獻則以飲為主食禮九舉則以食為主出入有禾
米芻薪之費故五積問以問其無恙勞以勞其勞苦
故三問三勞已上皆上公之禮諸侯降殺於公則以
七為節其所以異於諸公者執信圭七寸立當前疾
擯者四人王禮壹裸而酢而已其他則與諸伯之執
躬圭者皆殺於上公之禮也諸子降殺於侯伯則以
五為節其所以異於侯伯者執穀璧五寸立當車衡

擯者三人王禮壹裸不酢而已其他則與諸男之執蒲璧者皆殺於侯伯之禮也此亦典命所謂侯伯七命子男五命之節或援先儒之說曰自上公之禮至其他皆如諸子之禮非朝禮也朝禮服皮弁而此云冕服朝禮偏駕不入王門如同姓金路以下皆舍於館乘墨車龍旂以朝而此云樊纓朝禮天子不下堂見諸侯而此云賓主之間有立位之差果朝禮乎是不然皮弁日眡朝而已玉藻曰裨冕以朝註謂公

衮侯伯鷩子男毳乃冕服之制知此命圭五等以至
纁藉冕服之三等皆朝禮也偏駕不入王門王門之
外而已庭燎之詩曰君子至止鸞聲將將註謂君子
諸侯將將鸞鑣聲乃樊纓之制知此則知建常樊纓
以至二車之類凡三等皆朝禮也不下堂而見諸侯
特漢儒之說爾經之齊僕曰朝覲宗遇饗食皆乘金
路其法儀各以其等為車送逆之節註謂迎賓及送
相去遠近之數知此則知朝位賓主之間步立之儀

皆朝禮也上公之禮其位相去九十步侯伯七十步
子男五十步後鄭雖不得其說止曰賓下車及王車
出迎所立處若賈氏則直以為在朝乃有此迎賓之
法經既明言朝位則是外朝之位有此迎賓之灋朝
禮既訖然後於祖廟行受享之禮故將幣三享以至
王禮之裸諸侯之酢又至於饗禮食禮皆廟中之禮
此廟禮與朝禮其別如此豈可強為之說

凡大國之孤執皮帛以繼小國之君出入三積不問壹

勞朝位當車前不交擯廟中無相以酒禮之其他皆眡
小國之君

經言執皮帛者大宗伯言孤執皮帛則天子之孤也
典命言凡諸侯之適子未誓則以皮帛繼子男又言
公之孤以皮帛眡小國之君此言大國之孤則為上
公之孤大國之孤執皮帛而上同乎天子之孤者天
子六命之孤而執皮帛束帛而加之以虎皮也上公
四命之孤而執皮帛束帛而加之以豹皮也若夫諸

侯之適子未誓者以皮帛繼子男不純乎子男也公之狐執皮帛以繼小國之君亦不純乎小國之君也所謂繼小國之君者狐以君命來聘則其位在子男之後子男朝禮既畢則繼其後而進出入之積問勞之禮視子男而降殺其朝位當車前則其進而近君也俞覺而速其傳辭則不使介交於王之擯行聘享於廟之時亦不用相禮之人王禮之用酒而已此其所以降殺於子男者若其他如貳車以至饗食之禮

皆與子男同故曰眡昭二十二年叔孫婁曰列國之卿為小國之君固周制也此所謂眡小國之君者也眡之為言輕重不同而皆倣其禮則不純乎小國之君明矣

凡諸侯之卿其禮各下其君二等以下及其大夫士皆如之

王制言次國之上卿位當大國之中中當其下下當其上大夫小國之上卿位當大國之下卿中當其上

大夫下當其下大夫其有中士下士數各居上之三
分與左氏所載臧宣叔之言大略相似皆以次國之
諸臣而降大國一等小國之諸臣而降大國二等也
此言諸侯之卿大夫士其禮各下其君二等以本國
之君卿大夫士而以次降二等爾蓋有上公之卿有
侯伯之卿有子男之卿其命數為不同王朝禮之如
介與朝位賓主之步各降二等則公之卿以七侯伯
之卿以五子男之卿以三正與聘義所謂上公七介

侯伯五介子男三介之說同然大國之孤胝小國之君則子男以五為節凡為禮皆五今上公之孤胝子男五介而其卿乃七介則是大國之孤降於其國之卿矣此殆有深意存焉孤執皮帛繼小國之君則同小國之君皆以五介而受贄於朝卿不得受贄於朝但以執羔七介受享於廟而已以下及其大夫士亦如之亦如卿之禮而殺其數其他如大夫執鴈士執雉則其命數固自不同也如定八年公會晉師於瓦

范獻子執羔趙簡子中行文子皆執鴈雖春秋之世
不廢命數其禮可知矣

邦畿方千里其外方五百里謂之侯服歲壹見其貢祀
物又其外方五百里謂之甸服二歲壹見其貢嬪物又
其外方五百里謂之男服三歲壹見其貢器物又其外
方五百里謂之采服四歲壹見其貢服物又其外方五
百里謂之衛服五歲壹見其貢材物又其外方五百里
謂之要服六歲壹見其貢貨物

邦畿言畿而六服言服內外小大之辨也職方氏言
九服之邦國而行人止言六服者蓋自侯服以至要
服即職方氏蠻服以上雖有遠近皆十二歲天子巡
守所至故待之以中國之禮惟夷鎮二服不見於大
行人之職其言九州之外謂之蕃國則此夷鎮二服
實在九州之內蓋先王以其荒遠非巡守所至故不
列於六服鄭氏徒見此二服不列於六服遂一概以
為九州之外曰九州之外夷服鎮服蕃服也經止言

蕃服而鄭氏乃加之以夷鎮二服非矣又見要服以上每服各五百里六服凡三千里相距六千里兼王畿千里遂謂此六服去王城三千五百里相距方七千里尤不知禹迹之實數也蓋禹貢九州之內列為五服方五千里至州則於九州之內為王畿為夷鎮以上之八服亦方五千里而蕃國一服在九州之外然則成周言九服與禹貢言五服何以皆言方五百里曰禹之五服則各計其一面之數周之九服則通

計其兩面之數何謂各計其一面之數禹之甸服千里而止言五百里一面之數也何謂通計兩面之數周之王畿不言五百里而言千里兩面之數也蓋禹貢五服王之甸服千里在內自甸服至荒服各五百里凡二千五百里兩面則為五千里至於職方氏所載則王畿千里不在九服之內自方五百里之侯服至方五百里之鎮服每服五百里計其一面各二百五十里九服并王畿一面則為二千五百里兩面亦為

五千里是為九州由此觀之周之邦畿即禹貢之甸服也周之侯服甸服即禹貢之侯服也周之男服采服即禹貢之綏服也周之衛服蠻服即禹貢之要服也周之夷服鎮服即禹貢之荒服也是禹貢之與周制其九州之地皆五千里無可疑者不然則職方氏所載九州之山川澤浸其名不出禹貢九州之域雖時有損益而皆不改乎禹貢九州之舊孰謂其廣地於禹貢九州之外耶然而夷服鎮服不列於六服者

以其為禹貢之荒服非天子巡守之地然則九州之內則其待之也實與要服同其禮惟此六服朝畢十二年王乃巡守則是王巡守之禮止及六服故也若夫侯服歲一見則每歲而見甸服二歲一見則在二年四年六年八年十年男服三歲一見則在於三年六年九年采服四歲一見則在於四年八年衛服五歲一見則在於五年十年要服六歲一見則在於六年而夷鎮二服亦然若十二年則皆從王巡守鄭氏

謂朝之歲四方趨四時而來或朝春或宗夏或覲秋
或遇冬此其說可信至於貢祀物以至貢貨物其名
與大宰之九貢同而其實則非也大宰以九貢致邦
國之用歲貢之常也小行人之春入貢是已大行人
之所謂六貢則因朝而貢者行人有小大而其貢有
同異各分其職而已矣

九州之外謂之蕃國世壹見各以其所貴寶為摯

經言九州之外謂之蕃國而鄭氏乃以夷服鎮服併

列於九州之外非經之明文也且弼成五服至於五
千乃舜之十二州禹治水成功別九州塗山之會執
玉帛者萬國則亦九州之內五服在周則夷服鎮服
以上是已若夫外薄四海咸建五長即周之所謂蕃
服者當時雖不言所貢之遠物而其言五長則有職
必有貢故也至周人始詳其制天子巡守止於六服
而夷鎮二服在九州之內則其朝貢繼於要服之後
九州外之蕃國雖列於九服之末然世一見則不責

以中國之禮各以其所貴寶為摯則不強以中國之物如武王克殷而西旅貢獒肅慎氏貢其楛矢以其所貴寶為摯也故明堂位朝諸侯於明堂而四夷皆在四門之外以成王之嗣位也世一見明矣併列夷鎮二服豈所以待九州之諸侯耶

王之所以撫邦國諸侯者歲徧存三歲徧頰五歲徧省七歲屬象胥諭言語協辭命九歲屬瞽史諭書名聽聲音十有一歲達瑞節同度量成牢禮同數器脩濬則十

有二歲王巡守殷國

撫諸侯而言邦國諸侯者非獨厚其君也凡先王所以建君公后辟上以蕃王室下以輯百姓而已使其於百姓而不能推其德意於王室而不能守其政刑雖曰撫之非所以撫之也王制曰天子巡守命典禮考時定日同律禮樂制度衣服正之山川神祇有不舉者為不敬不敬者君削以地宗廟有不順者為不孝不孝者君絀以爵變禮易樂者為不從不從者君

流革制度衣服者為畔畔者君討有功德於民者加地進律然不徒舉是禮而已始焉存之類之省之終焉瑞節度量不差其制數器灋則不失其守使其一德以尊天子則其為撫諸侯也大矣存類省鄭氏以謂王使臣於諸侯之禮所謂間問是也歲存則問而存之三歲徧類則問而視之五歲徧省則巡而察之七歲屬象胥諭言語則通五方之言語協辭命則合九等之辭命皆象胥之職也九歲屬瞽史諭書名則

達六書之文聽聲音則察五言之和皆瞽史之職也
至十有一歲然後為之察諸侯之政刑瑞節用於小行
人之官從而達之牢禮主於掌客之官從而成之灋則
正於匡人之官從而脩之度量數器一於合方氏之
官從而同之凡此皆所以待王之巡守也至於十有
二歲天子於是行巡守之禮諸侯各朝於方岳之下
天子謂之巡守則巡所守也諸侯謂之述職則述所
職也雖有省耕省斂之政而亦不無流連荒亡之戒

以至加地進律與夫削地絀爵之類皆以次而舉此
乃所謂無非事者若王不巡守則行殷國之禮會諸
侯於國之外亦如巡守之事此皆所以撫邦國諸侯
者也

凡諸侯之王事辨其位正其等協其禮賓而見之
王事謂諸侯朝王之事辨其位謂九十七十五十步
之位正其等謂尊卑之等如冕服旗旂貳車之類協
其禮謂牢禮饗燕積膳之禮賓謂以賓禮見之也

若有大喪則詔相諸侯之禮

諸侯為天子服斬衰其喪禮皆有瀼故也

若有四方之大事則受其幣聽其辭

四方之大事鄭氏謂國有兵寇諸侯來告急者禮動不虛皆有贄幣以崇敬也受之以其事入告王也其說誠當文二年秦伯使乞術聘魯且言將伐晉襄仲辭王客曰不腆幣器不足辭也致諸執事以為瑞節此用幣以告用兵之證諸侯相告如此而況告於天

子者乎然小行人之官乃以此待小客蓋小客不交
擯受其幣而聽其辭宜也此言大事則非小客不交
擯之比鄭氏乃引聘禮曰若有言則束帛如享所謂
有言者蓋因聘而有所請於王言則天子聽之束帛
則天子受之非大行人所得而與若援此以證必如
享禮則緩不及事失先王之意夫兵寇而有請若解
倒懸然豈可以常禮拘大行人受其幣而聽其辭為
諸侯之告急者設也

凡諸侯之邦交歲相問也殷相聘也世相朝也

聘義云天子制諸侯比年一小聘三年一大聘是以諸侯自相聘為文則此經所謂諸侯之邦交者也其言比年一小聘則合於經之歲相問其言三年一大聘則異於經之殷相聘蓋殷聘者謂久無事則行盛禮也初無年歲之限如昭九年孟僖子如齊殷聘禮也服氏以為殷中也蓋自襄之二年叔老聘於齊至此殆二十一年故中行盛禮是知殷為大聘即非所

謂三年也當以此為正若夫世相朝者蓋諸侯即位
講好結信謀事補缺則有相朝之禮惟繼世者行之
成八年公如晉朝嗣君也襄三年公如晉始朝也此
雖以小朝大猶足以見諸侯世相朝之義若王制所
謂五年一朝者雖以諸侯朝天子為文鄭氏釋之則
曰晉文霸時所制蓋得於春秋昭三年傳鄭子太叔
之說是知晉文五年一朝之制已不知有天子之禮
如叔向所言間朝以講禮謂相朝於間一歲之近則

後世之繼霸者又欲求加於晉文始霸之制當時諸侯亦甘心以天子之禮事之鄭子犬叔既以為五歲一朝左氏之傳春秋亦以為諸侯再相朝以修王命古之制也以此為古制宜其習見霸者之僭禮而不知大行人所掌邦交之禮諸侯亦惡其害已而皆去其籍成周典禮至是不復存矣

小行人掌邦國賓客之禮籍以待四方之使者

成周以九儀辨諸侯之命等諸臣之爵名位有上下

之等儀文有隆殺之節小行人皆記之以籍此所以掌邦國賓客之禮籍蓋其籍有在王官者有在諸侯者周稱籍談曰昔而高祖孫伯黶司晉之典籍以為大政故曰籍氏諸侯自為籍如此則掌之王官者為可知小行人使適四方協九儀賓客之禮蓋以王官所掌之籍而合諸侯所記之籍故曰協大行人以此待大賓大客小行人以此待四方使者職之相承如此令諸侯春入貢秋獻功王親受之各以其國之籍禮之

小行人掌禮籍以待四方使者蓋以別大行人之親諸侯也然自春入貢以下則皆待諸侯之事令云者以天子之命令之也令諸侯春入貢乃每歲之常貢即大宰之九貢是已必使春入之者以邦國所貢出稅於民經冬至春乃可貢於王故必因大行人所謂春朝圖事而入之圖事於春必獻功於秋大行人又於秋覲而比邦國之功所謂令者如此當是時也諸侯述職親執壤奠王者重其事則為之親受其禮各

以其國之籍禮之者是又以邦國所記之籍協王官所記之籍而以待之也

凡諸侯入王則逆勞于畿及郊勞胝館將幣為承而擯
凡諸侯入王謂入而朝王逆勞于畿使小行人往小
行人之明文也惟郊勞無所見賈氏謂王使勞賓于
郊者為大行人雖經無明文可以類推覲禮賓至於
郊王使人皮弁用璧勞鄭氏以為近郊重其禮也使
人即王人也據賈氏近郊使大行人則遠郊亦使大

行人歟蓋大行人勞于郊則小行人勞于畿小行人
至郊勞之時又先為之胝館蓋賓國天子館之前朝
前朝者庫門外之朝右九棘之位也及廟中將幣三
享則為承擯擯與相一也出接賓曰擯入詔禮曰相
出入異辭也小行人既為承擯矣而肆師又曰大朝
覲佐價此為大朝覲設若常朝覲則小行人為承擯
而已此所以不同

凡四方之使者大客則擯小客則受其幣而聽其辭

大客謂諸侯之使者也凡時聘殷頤皆於廟中行享禮擯而見之與諸侯同但旅擯不交擯耳交擯者傳辭於末擯示不敢與天子抗乃諸侯之禮若旅擯王使人與之言其享禮皆有圭璋受幣聽辭天子也非行人也若小客則蕃國使者不可直達于天子故小行人為之受其幣聽其辭

使適四方協九儀賓客之禮朝覲宗遇會同君之禮也存頤省聘問臣之禮也

賓謂命者五客謂爵者四邦國不一則九儀不可以
不協小行人使適四方先協而同之使知朝覲宗遇
會同為君之禮存類省聘問為臣之禮習之有素行
之有常一旦以賓客而入見於王朝則名位嚴而儀
物稱典禮舉矣

達天下之六節山國用虎節土國用人節澤國用龍節
皆以金為之道路用旌節門關用符節都鄙用管節皆
以竹為之

掌節之守邦節與行人達天下之節蓋聯事而通治也然小行人有管節而無玉節角節璽節者何也以其掌適四方之事非正掌天下之節但因以達六節而已邦國都鄙之節掌節授之門市國貨之通掌節聯之非行人之所達也此所以不言玉節角節璽節歟惟龍虎人之三節則用之於內外之使臣旌符管之三節則用之於王國及侯國小行人之所達達此而已然行人於都鄙用管節而掌節言守都鄙用角

節蓋所守所用之不同故也

成六瑞王用瑱圭公用桓圭侯用信圭伯用躬圭子用穀璧男用蒲璧

大宗伯於六瑞言執執之以為守者也此六瑞所以掌邦國小行人無與乎等邦國之事因其使適四方則成其六瑞而已故不言執而言用所謂用六瑞者言其為上下之所通用苟王朝用之而邦國異焉則無以驗乎下邦國用之而王朝異焉則無以合乎上

惟小行人為之掌成於內外是以尊卑有定用名分
正而禮法嚴故謂之成成與大行人所言成牢禮同
義

合六幣圭以馬璋以皮璧以帛琮以錦琥以繡璜以黼
此六物者以和諸侯之好故

合配也取兩兩相配之義六幣而必配以六器之王
者玉所以象德也幣所以行禮也兩兩相配皆有義
存焉何以言之圭用於東方者也有始事之義而馬

為天駟為辰次之始亦東方之象故合圭以馬璋用
於南方者也有致飾之義而皮用虎豹有自然之飾
亦南方之象故合璋以皮璧用於天者也而天事尚
質帛為純素之物亦以質為尚故合璧以帛琮用於
地者也而地事尚文錦為華麗之制亦以文為貴故
合琮以錦琥用於西方者也象乎物之成五采備謂
之繡則有物成之象故合琥以繡璜用於北方者也
象乎事之斷白與黑謂之黼有致斷之義故合璜以

黼馬皮帛錦繡黼則行禮之幣圭璋璧琮琥璜則比德之玉故有是君德享以如是之玉必合以如是之幣使其往來交際皆有一定之禮故曰以和諸侯之好故大宰之幣貢釋者曰玉幣皮馬也則幣之為用廣矣此小行人之合六幣鄭氏乃云二王後尊享用圭璋而特之其於諸侯亦用璧琮耳子男於諸侯則享用琥璜未必然也彼見玉人之事曰璧琮九寸諸侯以享天子言九寸則上公之禮上公是璧琮則圭

璋是二王後特之者惟有皮馬無束帛可加故云特
其諸侯亦用璧琮者又見玉人之事曰琬琮八寸諸
侯享夫人明享君用璧亦八寸是下享天子一寸如
是明二王後相見不可同於天子用圭璋則用璧琮
可知言是兩公自相朝二王後稱公是於諸侯還同
二王後可知云子男於諸侯享用琥璜者覲禮子男
已入侯氏用璧琮則子男自相享退用琥璜可知此
鄭氏以意推之豈盡合乎成周之制今攷小行人之

職不過曰合六幣而已璧琮琥璜則施之於帛錦繡黼也圭以馬璋以皮則皮馬不上堂故圭璋言特記曰圭璋特達德也又曰束帛加璧往德也以至琮之於錦琥之於繡璜之於黼亦莫不然如必二王之後用圭璋諸侯相朝用璧琮則典瑞言琢圭璋璧琮繅皆二采再就以頰聘則諸侯固得而通用之矣如又曰子男於諸侯享用琥璜則聘享之禮未有專言琥璜者惟禮器曰琥璜爵則又非子男所得專用以為

享者也要之合六幣之說即庭實之事諸侯用之以
享天子亦用之以自相享之禮聘以爵命為之隆殺
則不可知以典瑞及玉人無明文不可臆說

若國札喪則令賻補之若國凶荒則令賙委之若國師
役則令搞襚之若國有福事則令慶賀之若國有禍災
則令哀吊之凡此五物者治其事故

此經繼於合六幣之後正為此五物者說也方其無
事小行人為之使適乎四方邦國以和諸侯之好故

及其有禍福之事則令諸侯講信脩睦而同其憂樂
之情若國札喪則令賻補之謂資之以財即凶禮所
謂喪禮哀死亡者也若國凶荒則令賙委之謂助之
以粟即凶禮之荒禮哀凶札者也若國師役則令槁
糴之謂加之以燕勞即凶禮之恤禮哀寇亂者也若
國有福事則令慶賀之謂申之以贊美即嘉禮之賀
慶親異姓者也若國有禍災則令哀吊之謂致之憫
恤即凶禮之弔禮哀禍災者也是五物者雖禍福憂

樂不同而皆謂之事故此以邦令行之而以王官治之

及其萬民之利害為一書其禮俗政事教治刑禁之逆順為一書其悖逆暴亂作慝猶犯令者為一書其札喪凶荒厄貧為一書其康樂和親安平為一書凡此五物者每國辨異之以反命于王以周知天下之故

上經以其五物治其事故謂其事皆有故也從其故而治之則五者之事無不舉此特言周知天下之故

則非若上五物之有事可治也從其本焉者治之而已蓋此經所謂五物者以萬民為本故先言萬民及萬民之利害為一書則害可革而利可興是欲以治天下之大利也其禮俗政事教治刑禁之逆順為一書則逆禁而順可導是欲以成天下之大順也惟欲成天下之大順故悖逆暴亂作慝猶犯令者為可革矣以此為書是乃禁其逆而導其順者也惟欲致天下之大利故其札喪凶荒厄貧為可恤矣以此為書

是乃除其害而興其利者也夫如是則康樂和親安平之效可坐而致故終之以康樂和親安平為一書此五物者為故雖不同而其本皆在乎民然千里有不同之風百里有不同之俗而況邦國有封疆之限則其書烏可混雜而莫辨小行人於是每國辨異之以反命于王以周知天下之故則王者端本於上而順利可周於天下矣

司儀掌九儀之賓客擯相之禮以詔儀容辭令揖讓之

節

九儀即大行人所掌之九儀辨諸侯五等之命則為大賓等諸臣四等之爵則為大客是九儀之禮非司儀之所掌也司儀所掌者特九儀賓客擯相之禮而已鄭氏謂出接賓曰擯入贊禮曰相蓋成周重賓客之禮大宗伯以卿為上相小行人以下大夫為承擯司儀以中士下士為末擯若大朝覲則肆師亦以下大夫為佐擯且擯何以亦謂之相下經曰每門止一

相及廟唯上相入是知相即擯也司儀為之詔其儀容辭令揖讓之節蓋所以相道賓客者特詳於末擯故司儀皆以禮詔之

將合諸侯則令為壇三成宮旁一門詔王儀南鄉見諸侯土揖庶姓時揖異姓天揖同姓及其擯之各以其禮公於上等侯伯於中等子男於下等其將幣亦如之其禮亦如之王燕則諸侯毛

將合諸侯謂時會以發四方之禁殷同以施天下之

政則為壇於國門之外命諸侯以行其事此壇之所
由作也其制三成為三尺發地一尺總為四尺覲禮
所謂壇深四尺是已壝上為壇壇之上為宮每旁一
門則為四門覲禮所謂宮方三百步四門是已所謂
令為壇者非合諸侯之時而後令為之也天子帥諸
侯拜日於東郊則為壇於國東禮日於南郊則為壇
於國南禮山川丘陵於西郊則為壇於國西禮月四
瀆於北郊則為壇於國北退加方明於壇上而祀焉

亦謂之方明壇方明木也方四尺其玄黃青赤白黑之六者以象上下四方之位所以教尊尊也詔王儀南鄉見諸侯者謂王行祀方明之禮諸侯上介皆奉其君之旂置于宮乃詔王升壇南鄉而立諸侯皆就其旂而立諸公東階之前北面東上諸侯東階之東西面北上諸伯西階之西東面北上諸子門東北面東上諸男門西北面東上王揖之者定其位也揖之則以同姓異姓庶姓為主示其情也庶姓無親者也

土揖則推手小下之異姓則婚姻之邦也時揖則平
推手以向之同姓則兄弟之邦也天揖則推手小舉
之情之所在其等差如此及其擯之者謂三揖既畢
諸侯執玉而前見於王也擯之各以其禮則有上等
中等下等之別覲禮所謂壇十有二尋每尋以八尺
計之則為廣九十六尺堂上方二丈四尺以為王立
與祀方明之所每等兩廂各丈二尺以為諸侯奠玉
之所共九十六尺矣諸侯各以其等奠玉降拜升成

拜明臣禮也明臣禮而公侯伯子男以爵言者示其分也公奠玉於上等降拜於中等侯伯奠玉於中等降拜於下等子男奠玉於下等降拜於地及升成拜皆於奠玉之處分之所在其等差如此然朝覲雖有壇而諸侯將幣及玉以酒禮之者在廟惟大會同之事則皆於壇之三等其將幣三享與夫王禮再裸而酢王禮壹裸而酢王禮壹裸不酢皆言亦如之者謂公於上等侯伯於中等子男於下等亦如擯之之禮

此言因大會同而就壇行饗禮者也左氏曰饗終乃燕則繼之以在寢之燕可知矣燕以示慈惠則諸侯之毛者為主二毛曰老故曰燕毛言毛則親踈之以姓言者不必論也尊卑之以爵言者亦不必論也以毛為尚而已中庸曰宗廟之禮所以序昭穆也序爵所以辨貴賤也燕毛所以序齒也序昭穆親親也辨貴賤貴貴也燕毛序齒老老也一舉而三善備焉合諸侯之謂矣十二歲王巡守合諸侯於方岳之下者

倣此

凡諸公相為賓主國五積三問皆三辭拜受皆旅擯再
勞三辭三揖登拜受拜送主君郊勞交擯三辭車逆拜
辱三揖三辭拜受車送三還再拜致館亦如之致餐如
致積之禮及將幣交擯三辭車逆拜辱賓車進答拜三
揖三讓每門止一相及廟唯上相入賓三揖三讓登再
拜授幣賓拜送幣每事如初賓亦如之及出車送三請
三進再拜賓三還三辭告辟致饗餼還主饗食致贈郊

送皆如將幣之儀賓之拜禮拜饗餼拜饗食賓繼主君
皆如主國之禮諸侯諸伯諸子諸男之相為賓也各以
其禮相待也如諸公之儀諸公之臣相為國客則三積
皆三辭拜受及大夫郊勞旅擯三辭拜辱三讓登聽命
下拜登受賓使者如初之儀及退拜送致館如初之儀
及將幣旅擯三辭拜逆客辟三揖每門止一相及廟唯
君相入三讓客登拜客三辟授幣下出每事如初之儀
及禮私面私獻皆再拜稽首君答拜出及中門之外問

君客再拜對君拜客辟而對君問大夫客對君勞客客再拜稽首君答拜客趨辟致饗餼如勞之禮饗食還圭如將幣之儀君館客客辟介受命遂送客從拜辱于朝明日客拜禮賜遂行如入之積凡侯伯子男之臣以其國之爵相為客而相禮其儀亦如之凡四方之賓客禮儀辭命餼牢賜獻以二等從其爵而上下之凡賓客送逆同禮凡諸侯之交各稱其邦而為之幣以其幣為之禮諸公相為賓謂世相朝也賓之入境主君命卿以勞

之曰主國主國五積三問者蓋賓所停止則有積所以備賓之用也間闕則有問所以致敬於賓也積問皆三辭者以其禮來於外示不敢當也拜受皆旅擯者擯而不傳旅而陳之示不敢輕也再勞亦主君命卿勞於遠郊者其三辭拜受同於積問皆所以尊而敬之也然積問受之於庭故不言登再勞必有幣下拜於堂而登受之故曰三揖登拜受所謂拜送則賓送使者亦拜之重主君之命也然以遣卿再勞為未

足主君又躬行郊勞之禮則其勤至矣交擯者謂賓
與主君在道皆不為主不陳五擯各陳九介以傳辭
也蓋近郊有館賓在內主君至館大門外主君北面
而陳此九介去門九十步東面賓在大門內於門外
之東亦陳九介西面三辭者以主君郊勞之禮故耳
車逆拜辱者傳辭既畢賓乘車出大門迎主君以拜
主君之辱三揖者入門與當曲當碑為三揖三辭者
辭讓升堂然後拜而受之也車送者謂主君之去賓

又出車以送之主君三還辭之然後賓再拜送之也
致館亦如之者主君郊勞之後賓始至國主國使大
夫授館而後君親致於賓其交擯三辭車逆拜辱以
至車送三還再拜亦如郊勞之禮也致飧如致積之
禮者始入境則有積始入館則有飧飧小禮也故如
致積之禮三辭拜受旅賓而已將幣謂賓至館之後
後日始行朝禮交擯三辭車逆拜辱賓車進答拜者
此並在大門之外賓去門九十步而陳九介主君在

大門之東陳五擯上擯入受命出請事傳辭與承擯
承擯傳與末擯末擯傳與末介末介傳與承介承介
傳與上介上介傳與賓賓又傳與上介上介傳與承
介承介傳與末介末介傳與末擯末擯傳與承擯承
擯傳與上擯上擯入告君如是者三謂之交擯三辭
車逆拜辱者傳辭既畢主君乘車出大門迎賓以拜
賓之辱亦如賓拜郊勞之禮賓車進答拜者進而答
主君之拜也三揖者主君遙揖賓使前北面三讓入

大門也云每門止一相者既入門則東至祖廟諸侯
五廟則五門五相及廟唯上相入即上擯上介須詔
禮故也三揖者亦謂入門揖當曲揖當碑揖也三讓
登者謂至階之時主君讓賓賓讓主君如是者三則
主君先登也再拜授幣者謂主君既登以幣享之主
君再拜受之不曰受而曰授者主君於賓授幣則再
拜受之也賓拜送幣者退向西階上北面拜送幣乃
降也每事如初者謂享及有言也賓亦如之謂以鬱

幣禮賓也其儀容辭令揖讓之節皆如將幣之禮及
賓出主君車送三請三進請賓就車也主君一請一
進賓亦一還一辭故曰三還三辭則已避去也故終
之以告避也熟食謂之饗生物謂之餼還主則主君
還主於賓饗以飲為主食以食為主致贈謂賓去而
贈以賄也郊送謂主君送賓復至於近郊也此七者
唯饗食速賓而餘皆主君親往焉故其儀皆如將幣
之儀賓之拜禮者謂饗餼饗食皆禮之重者故拜焉

就朝而拜之也賓繼主君皆如主國之禮者鄭氏謂復主人之禮費而不知主國之禮何禮也豈有往來交際而復其禮費如市道之交者耶蓋主君使卿勞賓于境必為致幣故有拜受之禮其致幣雖無明文以覲禮考之賓至于郊王使人皮弁用璧勞此天子勞賓之禮則知諸侯勞賓亦以幣此所謂主國之禮蓋先王制禮有施必有報而施報有輕重之辨惟其有施有報此賓所以有繼主君之禮惟其施報之欲

稱此賓之報不如主君之禮特如主國之禮而已以至侯伯子男命數不同其儀則一故曰各以其禮相待也如諸公之儀

凡行人之儀不朝不夕不正其主面亦不背客

此謂行人之與乎傳辭贊禮者故曰凡行人之儀日出為朝朝東也日入為夕夕西也記所謂為朝夕必因日月是已蓋主出自內而位乎北賓至自外而位乎南而東西在乎賓主之間今行人之儀不朝以東

嚮不夕以西嚮不正其主面而南嚮亦不背客而北
嚮蓋居賓主之間得以兩嚮之隨寓擯相其勢然也
行夫掌邦國傳遽之小事媿惡而無禮者凡其使也必
以旌節雖道有難而不時必達居於其國則掌行人之
勞辱事焉使則介之

欽定四庫全書

周官總義卷二十五

宋 易祓 撰

環人掌送逆邦國之通賓客以路節達諸四方舍則授館令聚橐有任器則令環之凡門闕無幾送逆及疆

此環人與夏官環人其義不同夏官環人掌致師乃致師之義此則送逆賓客四面而環之者也所謂送逆邦國之通賓客者以邦國賓客取道往來環人則

以路節達諸四方路節即旌節之用於道路者其實一而已舍則授館者非行人致館之比謂其取道往來則以國野之館授之即遺人所謂五十里有市市有候館是已又令野廬氏以守涂地之人為之聚攔者所以見出入之有所守有任器則令環之者守其所須之物亦所以為非常之備凡門關無幾送逆及疆者是雖賓客取道往來於王國環人亦為之達諸路且使人之各得其所王者之政也

象胥掌蠻夷閩貉戎狄之國使掌傳王之言而諭說焉
以和親之若以時入賓則協其禮與其辭言傳之凡其
出入送逆之禮節幣帛辭令而賓相之凡國之大喪詔
相國客之禮儀而正其位凡軍旅會同受國客幣而賓
禮之

象胥掌四夷之言者也東方曰寄南方曰象西方曰
狄鞮北方曰譯周興王業惟南方先服故特以象名
官而胥則取其才智焉先王設象胥之官既使之譯

四方之言則蕃國使者之來乃傳王之言而諭說焉以和親之若蕃國之君以時入賓而行世一見之禮則其所習雖不同乎中國象胥則以中國之儀而協其禮與其辭言傳之雖不能變其聲音亦可以通其事之意然後譯其辭而言之於上也凡其出入送逆之禮節幣帛辭令而賓相之者皆象胥所以擯相蕃國之事若遇國之大喪則詔相國客之禮儀而正其位若遇軍旅會同則受其幣而賓禮之盖先王不鄙

夷其人既設象胥以待之則亦示以中國之禮而已
凡作事王之大事諸侯次事卿次事大夫次事上士下
事庶子

先王所以有事於四夷惟征伐為大事其次則有威
讓之令文誥之辭而次事下事分焉凡邦國之諸侯
內為扞屏外則敵王之愾故大事則諸侯之所作也
若卿大夫士庶子則各以其尊卑而分任其事言庶
子而不言中士下士則以所任者同耳

掌客掌四方賓客之牢禮餼獻飲食之等數與其政治
掌四方賓客而名官以掌客者賓亦可以謂之客也
牢禮即凡用牢之禮餼謂餼九牢之類獻謂禽獻之
類飲食謂饗燕膳食之類凡其等數與其政治皆所
以序下文也鄭氏以邦新殺禮釋之未之盡矣

王合諸侯而饗禮則具十有二牢庶具百物備諸侯長
十有再獻

傳曰制禮上物不過十二天之大數也故王者以十

二為節不可以有加焉今王之饗諸侯衆則十有二
牢長則十有二獻鄭氏遂以為用王禮之數者以公
侯伯子男盡在是兼饗之莫敵用也謂之兼饗莫敵
用可也謂用王禮之數不可也牢具十有二而莫適
所主獻至十有二而少異於衆則其禮盖有品節之
矣

王巡狩殷國則國君膳以牲犢令百官百姓皆具從者
三公眡上公之禮卿眡侯伯之禮大夫眡子男之禮士

眡諸侯之卿禮庶子壹眡其大夫之禮

上經言王合諸侯而饗禮此遂言王巡守殷國國君膳以牲犢令百官百姓皆具若所以明施報之義然君臣不可以施報言也盡其禮之實而已然禮之所在有以少為貴者有以多為貴者國君膳王以牲犢則以少為貴者舉天下之物不足以為吾君之報惟牲用鬯粟乃事天之禮是以事天之禮事其君也百官百姓皆具此以多為貴者不特百姓皆具而公卿

大夫士庶子皆加於王朝一等是厚其禮以待其臣者乃所以尊吾君也記曰禮之以多為貴者以其外心也禮之以少為貴者以其內心也內盡其心以事其君外盡其物以待其臣各盡其道而已矣

凡諸侯之禮上公五積皆貤餐牽三問皆修羣介行人宰史皆有牢餐五牢食四十簋十豆四十鉶四十有二壺四十鼎簋十有二牲三十有六皆陳饗餼九牢其死牢如餐之陳牽四牢米百有二十筥醯醢百有二十甕

車皆陳車米視生牢牢十車車秉有五簋車禾眡死牢
牢十車車三秬芻薪倍禾皆陳乘禽日九十雙殷膳大
牢以及歸三饗三食三燕若弗酌則以幣致之凡介行
人宰史皆有餐饗餼以其爵等為之牢禮之陳數唯上
介有禽獻夫人致禮八壺八豆八簋膳大牢致饗大牢
食大牢卿皆見以羔膳大牢侯伯四積皆眡餐牽再問
皆修餐四牢食三十有二簋八豆三十有二鉶二十有
八壺三十有二鼎簋十有二腥二十有七皆陳饗餼七

牢其死牢如餐之陳牽三牢米百筥醯醢百甕皆陳米
三十車禾四十車芻薪倍禾皆陳乘禽日七十雙殷膳
大牢三饗再食再燕凡介行人宰史皆有餐饗餼以其
爵等為之禮唯上介有禽獻夫人致禮八壺八豆八簋
膳大牢致饗大牢卿皆見以羔膳特牛子男三積皆眡
餐牽壹問以修餐三牢食二十有四簋六豆二十有四
鉶十有八壺二十有四鼎簋十有二牲十有八皆陳饗
餼五牢其死牢如餐之陳牽二牢米八十筥醯醢八十

壘皆陳米二十車禾三十車芻薪倍禾皆陳乘禽日五十雙壹饗壹食壹燕凡介行人宰史皆有餐饗餼以其爵等為之禮唯上介有禽獻夫人致禮六壺六豆六簋膳眡致饗親見卿皆膳特牛

凡諸侯之禮即所掌牢禮餼獻飲食之等數是也上公五積侯伯四積子男三積皆眡飧牽者蓋上公飧五牢侯伯飧四牢子男飧三牢謂至館有飧入境有積其積皆眡餐牽則生致之而不殺明致積亦有牢

禮眡則眡其數而已上公三問皆修侯伯再問皆修
子男壹問以修於其始至而問間濶則有修焉修則
脯之加薑桂者也然其賓之問皆修而其羣介行人
之問則有牢君用修臣用牢鄭氏以為非禮然禮有
損而益者有益而損者有豐大禮而殺小禮者有豐
小禮而殺大禮者初未可以此為輕重至於侯伯子
男則不言臣用牢者以上公之禮為特優也至於館
則有飧禮上公五牢侯伯四牢子男三牢司儀所謂

致飧如致積之禮是已食謂庶羞之食陳於楹外東西共四列上公之列數以十侯伯之列數以八子男之列數以六簋所以盛稻粱也公堂上六東西夾各二故其為簋十侯伯堂上四東西夾各二故其為簋八子男堂上二東西夾各二故其為簋六豆菹醢器也公堂上十六東西夾各十二故其為豆四十侯伯堂上十二東西夾各十故其為豆三十有二子男堂上十二東西夾各六故其為豆二十有四禮器言天

子之豆二十有六諸公十有六諸侯十有二則言堂上之數而已壺所以盛酒其設於堂上及夾者亦如豆之數也銅羹器也有銅鼎有銅羹所謂腳臚臠亦所謂藿苦薇也羹熟於鼎而載之器凡飪一牢則正鼎九陪鼎三陪鼎即銅羹之鼎也正鼎即牛羊豕魚腊腸胃倫膚與夫鮮魚鮮腊之鼎也其數凡十有二既言有鼎十二又言上公銅四十有二侯伯銅二十有八子男銅十有八則銅為銅羹之器而已非鼎

也鼎牲器也簋黍稷器也公侯伯子男皆十有二而無所降殺者以牲與黍稷俱為食之主然鼎俎竒而籩豆偶故正鼎九陪鼎三皆設於西階之前簋堂上八東西夾各二夫簋盛黍稷皆十有二而簋盛稻粱乃降殺以兩者稻粱貴者所食而黍稷為上下通用之物此鼎簋所以同乎十二也腥即牲之腥者也腥謂鮮魚鮮腊之鼎牲謂牛羊豕魚腊腸胃倫膚之鼎或言牲或言腥互見也此與上文之正鼎九者何別

蓋上文之正鼎每鼎飪一牢殮五牢則飪一牢而腥
四牢殮四牢則飪一牢而腥三牢殮三牢則飪一牢
而腥二牢其數又以九為降殺上公牲四牢則凡三
十六侯伯牲三牢則凡二十七子男牲二牢則凡十
有八此正鼎陪鼎皆十有二而腥之鼎則降殺以九
蓋牽牲無鉶鼎腥牲亦無鉶鼎此飪腥之鼎所以不
同其數也自此以上皆為殮禮其言饗餼以下則皆
饗餼之禮矣饗餼公九牢則其五為死牢侯伯七牢

則其四為死牢子男五牢則其三為死牢故曰其死
牢如殮之陳陳者皆陳於門西如積或死或牽而皆
曰饗餼者蓋餼之為義有二按聘禮云主國使卿歸
饗餼五牢飪一牢腥二牢餼二牢此則餼為生矣故
鄭氏謂生曰餼僖三十三年鄭皇武子曰惟是餼牽
竭矣則此餼為腥矣故服氏謂腥曰餼是知致積致
殮致膳等皆用牢而餼得為牢禮者豈非此乎此死
牢牽牢之所以異也米有載之於筥者半斛曰筥上

公百有二十筥其為米六十斛侯伯百筥其為米五十斛子男八十筥其為米四十斛其設在於庭中醢穀陽也醢肉陰也其數亦以二十為降殺故上公百有二十甕侯伯百甕子男八十甕車皆陳以車乘甕而陳之也醢陳於碑東醢陳於碑西既陳則不復用車矣故侯伯子男皆言陳而不言車也上公言車米眡生牢牢十車車乘有五簋車禾眡死牢牢十車車三秬芻薪倍禾皆陳者車米則載米於車者也牽四

牢四牢分為四列然則牢十車米凡四十車也十六
斗曰簋十簋曰秉車秉有五簋為十五簋是二十四
斛也車禾則載禾於車者也禾藁實并刈者也車禾
眠死牢夫死牢如殮之數上公殮五牢牢十車則車
禾凡五十車也四秉曰筥十筥曰稷十稷曰秬每車
三秬則三十稷也芻薪倍禾皆陳則百車也皆陳謂皆
陳於門外也米在門東禾在門西芻薪雖取數於禾
而薪從米芻從禾也侯伯米三十車禾四十車芻薪

倍禾皆陳子男米二十車禾三十車芻薪倍禾皆陳
則又降殺之序也自此以上皆饗禮至於所陳則又
有可言者食也簋也豆也銅也壺也皆陳於堂上及
兩夾簋亦陳於堂上而與鼎並者並其數也非並陳
也鼎也腥也陳於阼階之前死牢也牽牢也陳於門
之西車米也車禾也芻薪也陳於門之外醢也醢也
陳於碑之東西掌客言饗餼之皆陳者二宮米與醢
醢並者以其皆在門內也米禾之車與死牢生牢兼

者以其皆在門外也言殮之皆陳者一而鼎也腥也同於簠簋豆銅之列者雖同其列而簠簋豆銅乃堂上之器鼎與腥乃堂下之器也乘禽謂乘行羣處之禽如雉鴈之屬上公日九十雙侯伯日七十雙子男日五十雙此中膳之禮也殷中也謂於中又以大牢膳賓不忘賓也上公侯伯皆言膳大牢而子男不言皆止於乘禽耳蓋賓客之道以十日為正行禮一旬之後有故未去則有致稍歸禽之禮漿人所謂共賓

客之稍禮是已但上公言以及歸而侯伯子男不言者間或略之耳上公三饗三食三燕侯伯三饗再食再燕子男一饗一食一燕隆殺之節也若弗酌則以幣致之者謂君或有故不親饗食燕之禮則饗有酬幣食有侑幣不饗則以酬幣致之不食則以侑幣致之所以見將意而致敬者不可廢也上公羣介行人宰史獨有牢公及侯伯子男之羣介行人宰史皆有殮饗餼而上介亦有禽獻此禮賓之介從也按聘禮

上介與賓同是以大夫餼賓云上賓上介皆大牢米
八筐衆介皆少牢米六筐但上賓有芻豢而上介無
芻豢耳此五等之上介皆有禽獻也但凡介行人宰
史皆有飧饗餼以其爵等為之牢禮者五等諸侯其
爵有五而其命有三故待諸侯從其命諸侯之臣其
命有五而其爵有三故待諸臣從其爵此凡介行人
宰史之禮異也上公侯伯八壺八豆八簋子男六壺
六豆六簋豆陳於戶東壺陳於東序此夫人助君

養賢之禮如內宰所謂致后之賓客之禮是已然上
公與侯伯同者抑以夫人之於上公有膳有饗有食
而侯伯則無食禮矣子男則膳視致饗是不復親饗
矣上公卿皆見以羔膳大宰侯伯卿皆見以羔膳特
牛子男親見卿皆膳特牛卿皆見者見於賓也以羔
則以其所贄見焉子男獨言親見卿者以王之卿六
命而子男五命故以親見卿為文言親見則有時乎
不親若卿有故則不造館見賓惟親見以羔乃致膳

焉此所以少異於上公侯伯之禮然皆卿所以助養賓者也或用大牢或用特牛亦禮之降殺故耳

凡諸侯之卿大夫士為國客則如其介之禮以待之

古者坐賓於西北位介於西南所以尊賓卑介也賓之尊以其敵主介之卑以其副賓此上經所謂凡介皆有牢皆有殮饗餼以其爵等為之牢禮之陳數宜也若夫諸侯之卿大夫士以聘問而自為國客則非介也具賓之體者也具賓之體則疑於賓矣乃如介

之禮以待之者何耶尊者之道為正為大卑者之道為副為小諸侯之卿大夫士臣也以為介者分之所當然以為國客者亦分之所當然以其爵等為之宰禮之陳數則知先王待賓客之禮固有常制耳

凡禮賓客國新殺禮凶荒殺禮札喪殺禮禍裁殺禮在野在外殺禮

禮者合於天時宜於地財當於人心者也乃若求之天而不得於時求之地而不足於財求之人而不當

於心則殺焉可也國新謂新建國者凶荒謂無年者
禍哉謂兵寇者在野在外謂非方岳及國門之外者
以王禮言之大荒大札天地有戡王皆為之不舉所
以為內省自疚之道至矣於是數者而殺禮抑以其
自處者而待賓客耶

凡賓客死致禮以喪用賓客有喪惟芻稍之受遭主國
之喪不受饗食受牲禮

賓客禮之常者也死喪禮之變者也凡賓客死則致

禮以喪用有君及父母之喪則惟芻稍之受遭主國之喪則惟受牲禮而饗食皆廢此禮之變者也亦裁之以常禮而已矣

掌訝掌邦國之等籍以待賓客若將有國賓客至則戒官修委積與士逆賓於疆為前驅而入及宿則令聚橐及委則致積至于國賓入館次于舍門外待事于客及將幣為前驅至于朝詔其位入復及退亦如之凡賓客之治令訝訝治之凡從者出則使人道之及歸送亦如

之

上經有訝士以訝四方之獄訟為主故曰士此以掌
四方之賓客為主故曰掌訝掌訝掌邦國之等籍者
非小行人所謂掌邦國賓客之禮籍乃九儀差數之
籍也所以訝賓客者必以此籍之差數而為之節若
將有國賓客至則戒官修委積者若牛人共積牛羊
人共積羊倉人共道路之穀積委人共委積之芻薪
則掌訝先以其籍而戒之既戒之矣然後與士逆賓

於疆為前驅而入士謂訝士也以訝士與行人送逆
賓客入於國則為之前驅而辟故也及宿則令聚橐
謂令野廬氏以野廬氏若有賓客則令涂地之人聚
橐故也及委則致積以王命致之於館也至於國賓
入館次於舍門外待事於客謂待賓客之有所求也
及將幣為前驅則導之以至於朝也至於朝詔其位
入復及退亦如之者謂入詔其位而復故位及退亦
詔其位也凡賓客之治令訝訝治之治謂理其事也

以告掌訝訝為如朝理之也凡從者出則使人道之
使其屬道之也及歸送亦如之謂逆至於疆則送亦
至於疆也且掌訝雖與訝士同於送逆然訝士與行
人送逆不及疆至於野而已訝士不前驅及野與國
則前驅以辟而已訝士不道從者之出入道客之出
入而已蓋訝士訝獄訟而掌訝訝賓客此詳畧所以
不同歟

凡賓客諸侯有卿訝卿有大夫訝大夫有士訝士皆有

訝

掌訝以中士八人為之而此言諸侯有卿訝卿有大
夫訝則非掌訝之所謂訝也鄭氏謂朝覲聘問之日
王所使迎賓客於館之訝蓋按聘禮云卿訝卿大夫
訝大夫士訝士賓即館訝掌公命此以諸侯之臣之
為國客者言之若以敵天子之使則命數為不等矣
以王之卿六命而上公九命侯伯七命故公侯伯為
國賓而卿皆見以羔以卿訝之宜也至于男則親見

卿以子男五命。眡王之卿則降一等矣。至於王之大
夫四命。而公侯伯之卿則三命。子男之卿則再命。王
之上士三命。中士再命。下士一命。而公侯伯之大夫
則再命。子男之大夫則一命。士皆有訝。而子男之士
則又有不命者矣。先王之待諸侯之臣。寧過於厚。毋
過於薄。賈氏謂訝將舍於館之外。宜相親也。此其親
諸侯之大者乎。

凡訝者。賓客至而往。詔相其事。而掌其治令。

上經因訝賓客而及卿大夫即館之訝此復言掌訝之職凡言修委積以下皆所治之令也

掌交掌以節與幣巡邦國之諸侯及其萬民之所聚者道王之德意志慮使咸知王之好惡辟行之使和諸侯之好達萬民之說

天地交而萬物通上下交而其志同交之為義大矣故先王設掌交一職而使之交通乎上下節所以為信行道必有節故也幣所以為禮相見必有幣故也

諸侯則據所以守邦國者而言萬民之所聚則據都
家縣邑之類而言是知掌交所巡必及其民非止邦
國之諸侯而已道王之德意志慮使咸知王之好惡
辟行之固也然天下之無公好惡久矣蓋之戒舜曰
罔違道以干百姓之譽罔咈百姓以從己之欲此君
臣儆戒無虞之所當先者所欲與之聚所惡勿施爾
宜三代之所以興也今也王之志慮出於王之德意
則所謂德者乃平康正直之德故曰無有作好遵王

之道無有作惡遵王之路惟遵王之道則所謂予攸
好德以至於哲謀肅乂乃天下之同好非作好也惟
遵王之路則所謂淫朋比德以至於狂僭豫急乃天
下之同惡非作惡也使天下咸知王之好惡而辟行
之則時人斯其惟皇之極矣其或不協於極不罹於
咎者又有皇極之君從而受之掌交之官從而和諸
侯之好使之蕃王室達萬民之說使之正王而邦國
上下交通無間此所以為皇極之世也

掌邦國之通事而結其交好以諭九稅之利九禮之親
九牧之維九禁之難九戎之威

通事謂朝覲聘問之事也結其交好則結其交通之
好有以結其交好而後可以王制諭之九稅九職之
稅方其裂土而封固已使之得征其民今又諭之以
稅之利則使之不殖於利者也九禮九儀之禮方其
列爵以等固已使之各守其爵今又諭之以九禮之
親則使之不乖其親者也九牧九州之牧大宰於施

典之際固已建其牧而使其大小之相維今又諭之以九牧之維所以使之知所聽命者也九禁九法之禁九戎九伐之戎大司馬掌九法以平邦國九伐以正邦國固已示之於平時之素今又諭之以九禁之難九伐之威尤所以使之知所警畏者也是五者皆王政之大若非掌交之所能諭惟掌交時有以申救之而命令之嚴實行乎其間是豈徒咸其輔滕口說也哉

掌察關

掌貨賄關

朝大夫掌都家之國治日朝以聽國事故以告其君長
國有政令則令其朝大夫凡都家之治於國者必因其
朝大夫然後聽之唯大事弗因凡都家之治有不及者
則誅其朝大夫在軍旅則誅其有司

周官以八則治都鄙蓋使之有所揆焉非特頒其常
而已故凡祭祀賓客之禮與夫衣服宮室車旗之禁

令則主之有都家之宗人士庶子衆庶之守及其車馬兵甲之戒令則主之有都家之司馬皆王官得以兼治之矣其在刑則為尤詳既有方士以聽其獄訟之辭而又為之立朝大夫之職凡彼有所治此有所令朝大夫則上下達之而已掌都家之國治即大宰所謂以八則待都鄙之治者也法雖出於大宰而其事則朝大夫掌焉日朝以聽國事故以告其君長國有政令則令其朝大夫因之以告都家之君若吏者

也凡都家之治於國者必因其朝大夫惟朝大夫達之而後聽之也唯大事弗因則冢宰聽之而已都家之治有不及者則朝大夫在所誅在軍旅則朝大夫弗預焉故誅其有司此都司馬家司馬之所責也

都則

闕

大宰以八則治都鄙故設官以專其職謂之都則然言都則不及家則者考大宗伯九儀之命惟五命然後賜則王之大夫四命則未與賜則之數故采邑謂

之家而不謂之都若卿以六命為小都公以八命為大都此所以置都則焉由是觀之八則通用於三等采地而以都為主其推行蓋有序矣

都士

闕

家士

闕

鄭氏都家之士主治都家吏民之獄以告方士者也
蓋方士掌都家聽其獄訟之辭辨其死刑之罪而要
之三月而上獄訟於國又曰凡都家所上治則主之

鄭蓋據此而云

欽定四庫全書

周官總義卷二十六

宋 易祓 撰

冬官考工記第六

冬官非火于秦也其亡久矣蓋自周轍既東之後諸侯惡其害已而滅去其籍是以太平鉅典不聞于孔門學者之傳習亦不見于先秦傳記之所紀載遺言湮沒誠可於邑其亦幸而煨燼既息復出于漢也其又不幸而編帙散逸冬官空焉河間獻王以千金求

之弗獲于是以考工記補其闕或曰考工記非周書也言周人上輿而有梓匠之制言周人明堂而有世室重屋之制言溝洫澮川而非遂人之制言旂旗旗旒而非大司馬司常巾車之制其眡周典誠大不類而不知三代有異制以意逆之而已書曰司空掌邦土居四民時地利而百工即四民之一也況其制度纖悉靡不備舉而其文亦邃偉閎麗足以發聖經之秘學者遺其迹而探其本則其于冬官也亦思過半

矣

國有六職百工與居一焉或坐而論道或作而行之或
審曲面勢以飭五材以辨民器或通四方之珍異以資
之或飭力以長地財或治絲麻以成之

有大人之事有小人之事自王公以至農婦是已百
工則並列於其間而本末精粗備焉貴賤不同均以
利天下為事故曰國有六職六職非先王之制記考
工者專為百工設也於是言百工居一而復序列六

職之義觀先後之序而工之為利博矣或坐而論道
莫尊於王公或作而行之莫貴於士大夫而百工乃
居王公士大夫之次或通四方之珍異以資之莫急
於商旅或長地材而治絲麻莫切於農婦而百工乃
居商旅農婦之首何也荀卿曰精於道者兼物物精
於物者以物物王公士大夫職於道者也故視百工
為先商旅農婦職於物者也故視百工為後惟守之
世謂之工者雖不過乎物而百工之事皆聖人所作

則實進乎道蓋形而上者謂之道形而下者謂之器而百工之職兼大人小人之事記考工者以百工而與居六職之一其意深矣哉

坐而論道謂之王公作而行之謂之士大夫審曲面勢以飭五材以辨民器謂之百工通四方之珍異以資之謂之商旅飭力以長地財謂之農夫治絲麻以成之謂之婦功

坐論謂之王公論治國平天下之道也作行謂之士

大夫行王公所論之道也上言王公下言士大夫而
不言孤卿舉上下以見其中則孤卿可知矣五財謂
金也木也水火土也傳所謂天生五材是已五材而
加以皮玉設色則為八材經所謂百工飭化八材是已
皮玉設色有非民用者故曰以飭五材以辨民器謂
之百工珍異則非地官之所謂珍異也質人言市之
珍異廛人言膳府之珍異場人言場圃之珍異而鄭
氏皆以為四時食物此非食物也凡民用所關則賤

者可以為珍而常者可以為異先王必有以通之故
曰通四方之珍異以資之謂之商旅飭力以長地財
者平地山澤之農皆與焉故言長地財絲可以為帛
麻可以為布而皆出於五畝之宅嬪婦化治而已故
言治絲麻以成之長者長於始也成者成於終也

粵無罽燕無函秦無廬胡無弓車粵之無罽也非無罽
也夫人而能為罽也燕之無函也非無函也夫人而能
為函也秦之無廬也非無廬也夫人而能為廬也胡之

無弓車也非無弓車也夫人而能為弓車也

聖人立成器以為天下利而器非人之所能為也專設百工之職是以工精其業而器便於人若舉國之人而皆能為之則非百工之常其性習然也粵居東南之極土多塗泥金錫生焉田器尤盛此夫人所以能為鎛則何以謂之無鎛燕居東北之極迫近邊境人善禦敵鎧甲尤精此夫人所以能為函則何以謂之無函秦處西陲汧隴涇渭之間地多細木善作矜

秘此夫人所以能為廬則何以謂之無廬胡為北夷
即獯鬻玁狁匈奴之屬初無屋宅田獵畜牧逐水草
而居此夫人所以能為弓車則何以謂之無弓車四
者謂之無非果無也名生於不足而亦泯於有餘四
國之人皆能為是器則有之名不立故爾
知者創物巧者述之守之世謂之工百工之事皆聖人
之作也

形而上者謂之道形而下者謂之器器雖百工之事

而聖人之道於是乎在惟天下之知者能明聖人之道而創其物又得天下之巧者運其心術而述知者之所創然後為百工者得以專習其藝而世守巧者之所述就其三者而言之以知視巧則知為精以巧視工則工為粗曰知曰巧曰工雖精粗不同要之所創者不出乎物所述所守者亦此所創之物皆百工之事而已記考工者推本乎聖人之所作則知形而下者之器皆形而上者之道也易曰備物致用立成

器以為天下利莫大乎聖人

爍金以為刃凝土以為器作車以行陸作舟以行水此皆聖人之所作也

此經所以證上經也所言不過四者之事何足以盡聖人之所作記考工者蓋以理而推之太極動而為陰陽布而為五行是五行者天地生成自然之理絳汨之而彝倫斁禹次之而彛倫敍此五行所以居九疇之初一今考工記所述刃之以金為體者以火為

用故於金言燦器之以土為體者以水為用故於土
言凝水行乘舟以濟不通陸行乘車以任重致遠則
木之為用無往而不利記考工者舉此四者以推五
行造化之理以明聖人器用之制使天下因物以窮
理則又不特此四者而已

天有時地有氣材有美工有巧合此四者然後可以為
良材美工巧然而不良則不時不得地氣也

此四者無一不備然後可以為器用之良或闕一焉

則又有重輕存乎其間世固有材美工巧而或至於不良者不時不得地氣也時若冬析幹春液角夏治筋秋合三材是已地氣若鄭之刀宋之斤魯之削吳粵之劍是已就其重輕而言則天時地氣為先材美工巧次之要不若合四者之為良也

橘踰淮而北為枳鸛鵒不踰濟貉踰汶則死此地氣然也鄭之刀宋之斤魯之削吳粵之劍遷乎其地而弗能為良地氣然也燕之角荆之幹玢胡之哥吳粵之金錫

此材之美者也天有時以生有時以殺草木有時以生
有時以死石有時以泐水有時以凝有時以澤此天時
也

百工之事貴乎巧而事有非人力之所能致則工巧
亦不可以專尚要必以天時地利材美為本此記考
工者所以詳言此三者之事蓋斥鹵之地不能使草
木之生植宜乎橘踰淮而北為枳鸛鵲不踰濟貉踰
汶則死也倡優之所不能使鐵劍之鋌利宜乎鄭之

刀宋之斤魯之削吳粵之金錫遷乎其地而弗能為
良也櫟杜之樗不能使之中規矩宜乎燕之角荆之
幹妙胡之筭吳粵之金錫所以獨稱乎材之美也善
耕者不能使冬種而春穫宜乎天有時以生殺草木
有時以生死石有時以泐水有時以凝澤無非因乎
天之時然也蓋天時有陰陽之異候地氣有燥濕之
異齊而其材有疏稊堅柔之異質三者備而後工得
以施其巧此經雖不詳言工巧而善用之三者則無

非工巧之事故曰合此四者然後可以為良

凡攻木之工七攻金之工六攻皮之工五設色之工五
刮摩之工五搏埴之工二攻木之工輪輿弓廬匠車梓
攻金之工築冶鳧臬段桃攻皮之工函鮑鞞韋裘設色
之工畫績鐘筐幌刮摩之工玉櫛雕矢磬搏埴之工陶
旋

考工記之言工者其數凡三十然攻木之工七而外
復有舂人之職其實則八也設色之工五而畫績分

為二其實則四也析而言之其數若差合而言之皆三十而已然有以人名者有以氏名者有以事名者惟畫績一職獨言所職之事其他如輪人與人之類則以人名之謂工以巧為能不必責之世守也如築氏冶氏之類則以氏名之謂官有世功族有世業必世習之為貴也言人則上經所謂工有巧是已言氏則上經所謂守之世謂之工是已然攻木無稱氏者攻金搏埴無稱人者蓋制木必以巧而金土實貴乎

世習寧非記者深得先王制作之意乎

有虞氏上陶夏后氏上匠殷人上梓周人上輿

上之為言尚也昔者聖人逆推世變之所趨而為之
默制其變所謂一代之制初非偏尚之為徇世儒泥
考工之說則曰四代各有所尚殊不知有虞氏之泰
尊則固尚陶矣而夏后氏之山罍則亦未始不尚陶
夏后氏之世室則固尚匠矣而殷人屋用重檐則亦
未始不尚匠殷之崇牙則固尚梓矣而夏后氏之龍

翼翼周人之璧翬則亦未始不尚梓周之乘路則固尚輿矣而有虞氏之鸞車夏后氏之鈎車殷之大路則亦未始不尚輿由是言之設一官制一器固不足以盡四代之所尚而捨是亦不足以推世變之所寓要之考工之說特舉一代所專尚者言之耳故一器而工聚焉者車為多

故者繼上文而言也上經言周人尚輿而工之所聚為多攻金之工六攻皮之工五設色之工五刮摩之

工五搏埴之工二惟攻木之工獨居七焉七者之中
弓廬匠梓各居其一而輪人輿人車人者乃居其三
又於三者之中輿人居其一輪人斫而二車人斫而
三其外又有輶人為輶是車之三工又別而為七此
一器而工多惟車為最以周人所尚故也

車有六等之數車軫四尺謂之一等戈秘六尺有六寸
既建而迤崇於軫四尺謂之二等人長八尺崇於戈四
尺謂之三等及長尋有四尺崇於人四尺謂之四等車

戟常崇於父四尺謂之五等酋矛常有四尺崇於戟四尺謂之六等車謂之六等之數

此兵車也詩曰伯也執殳為王前驅鄭氏引此文變之是車之六等為前驅所建可知矣所謂車軫四尺者兵車之輪六尺有六寸軹崇三尺有三寸加軹與轅之七寸則為四尺也是軹去地四尺矣自軹以上皆差以四尺其數凡六故六等之數軹一人二之外其兵有四曰戈秘曰殳曰車戟曰酋矛皆插而建之

於車戈秘六尺有六寸既建而止止戈為武之義也
及長尋有四尺車戟常首矛常有四尺皆置之車旁
備而不用之義也出則先刃入則後刃言不以刃向
國有國者之所宜遠也觀兵車之制而先王不急於
用兵可推矣

凡察車之道必自載於地者始也是故察車自輪始凡
察車之道欲其樸屬而微至不樸屬無以為完久也不
微至無以為戚速也

古者觀轉蓬而為輪然後因物生智而為車車之有輪所以利轉故察之之道一曰必自載於地者始二曰欲其樸屬三曰欲其微至車之材衆矣然載於地而衆力之所資焉者輪而已故察車自輪始其次則輪之用以完久為固軫之行以減速為利樸屬者言其附著於地則堅而不浮所以為完久也微至者言其踐行於地則微而不滯所以為減速也是三者皆察之以道故曰察車之道言道則超乎形數之表蓋

有非目力之所能給者矣

輪已崇則人不能登也輪已庫則於馬終古登阨也

已太也甚也崇高也庫下也終古猶言常也阨阪也

古人制器內窮天下之理外盡天下之法故大不踰

尋丈小不踰方寸所謂輪崇六尺有六寸天下之中

制也輪過於崇則其軫亦過於四尺矣故軾為太高

而人之力有所不能登輪或已庫則其軾亦不及四

尺矣故軾為太下而馬之力有所不能引人不能登

則其力怠馬不能引則常若登阪而倍用其力此非車之善者也

故兵車之輪六尺有六寸田車之輪六尺有三寸乘車之輪六尺有六寸

此以馬之高下為節也兵車革路也田車木路也乘車玉路金路象路也兵車乘車駕國馬田車駕田馬然兵車乘車之輪皆六尺有六寸而田車之輪獨六尺有三寸亦可以推先王緩急輕重之意矣

六尺有六寸之輪輶崇三尺有三寸也加軫與轆焉四尺也人長八尺登下以為節

輪之中為較較之末為輶輶後之橫木謂之軫軸上之伏兔謂之轆伏兔尾後即所以銜軸上載車軫者也自軫而上即車輿也輪崇六尺有六寸則輶居其中得三尺有三寸加軫與轆之七寸則車輿去地四尺矣人長八尺則與車輿去地之尺適得其半其長短升降適相稱焉故曰登下以為節

輪人為輪斬三材必以其時三材既具巧者和之轂也者以為利轉也輻也者以為直指也牙也者以為固抱也輪敝三材不失職謂之完

察車之道必自輪始而輪之為體不過三者而已轂也輻也牙也輪人何以察之斬三者之材因乎冬夏陰陽之時固有得乎天之時材之美者矣三材既具又必欲得夫工之巧者和之和之義亦有三轂當輪之中以虛受轄以實受輻則有取乎利轉輻上湊乎

轂而下實乎輪之圍則有取乎直指牙周乎輪之四圍以固轂輻之利則有取乎固抱合是三者則輪人之制可謂不苟矣雖歷時之久不能無弊既弊矣而三材各居其所猶不失職故謂之完

望而眡其輪欲其慎爾而下迤也進而眡之欲其微至也無所取之取諸圈也望其輻欲其掣爾而纖也進而眡之欲其肉稱也無所取之取諸易直也望其轂欲其眼也進而眡之欲其轉之廉也無所取之取諸急也

輪雖一物而備轂輻牙之三體此經言望其轂望其輻而不言望其牙者蓋望而眎其輪則牙在焉輪之制取乎圜故欲其慎爾而下迤又欲其微至慎爾而下迤者謂如中之冪物下直而不倚微至者謂微著於地周流而不滯此所以為圜也輻之制取乎易直故欲其掣爾而纖又欲其肉稱掣爾而纖者謂如人手之削而其下有殺小之勢肉稱者又如人體之壯而小大有相稱之勢此所以為易直也轂之制取乎

急故欲其眼又欲其轉之廉眼如人之眼隱然而起
轉之廉者以革鞅之欲其負幹而廉隅自見此所以
為急也望者遠而眊之也進者近而眊之也惟輪獨
貴乎望而眊者以察車自輪始加詳焉故耳

眊其綆欲其蚤之正也察其齒蚤不齧則輪雖敝不匡
齒謂輻入轂中者也蚤謂輻入牙中者也綆謂輪輦
也下經言六尺有六寸之輪綆三分寸之二是已蓋
鑿牙之始以三分寸之二為輻轂外輦輻轂外輦則

車行安帖而不掉故曰眊其綬欲其蚤之正以輪之
鑿孔取其正也輻入牙中者既眊之而欲其正則輻
入穀中者又察之而欲其與蚤不相齟賈氏謂齒牙
參差謂之齟今菑與蚤一一相當而無參差齟齬之
患若是則輪以久而不能無弊故雖敝其用不匡匡
方也不方則轉無所膠矣

凡斬轂之道必矩其陰陽陽也者積理而堅陰也者疏
理而柔是故以火養其陰而齊諸其陽則轂雖敝不歎

斬穀之道猶察車之道言道之無乎不寓散在萬物
雖察車斬穀皆有道存焉故也必矩其陰陽者陽木
稹理而堅陰木䟽理而柔使所斬之材各具堅柔疏
稹之性則取其陽者去其陰者初何待於矩惟一木
之性或有中堅稹而外疏柔者或有堅柔疏稹之相
間者不以矩而辨則器之成也必有緩急偏勝之弊
故輪人之斬穀於是有矩之道所謂矩者初非方
矩之矩而以方矩之法察之穀之材貴乎堅以火養

其陰則疏理而柔者雖不能必其積理而其堅則可以齊乎陽也故曰轂雖敝不蕲蕲暴也言矩得其道而轂材堅密無暴起之患也

轂小而長則柞大而短則擊

柞狹也擊危也小大欲其稱而已

是故六分其輪崇以其一為之牙圍

田車之輪六尺有三寸乘車兵車之輪六尺有六寸今以乘車兵車之輪言之六分其輪崇以其一為之

牙圍則牙圍尺有一寸當分為兩面鄭氏不分兩面只就一面尺有一寸上便說三分牙圍而漆其二若是則輪圍兩面為牙圍共二尺二寸矣實與經意不合今以兩面牙圍共一尺一寸言之則每面各得五寸半共為尺有一寸如此而後合六分取一之數參分其牙圍而漆其二

牙圍每面五寸半今先以四寸半三分之每分得一寸半是漆其二者為三寸其一不漆者為一寸半外

餘一寸三分之是漆者得三分寸之二兼上三寸共
為三寸三分寸之二不漆者得三分寸之一兼上一
寸半以半寸為十五分三分寸之一作十分是不漆
者共為一寸三十分寸之二十五鄭氏謂不漆其踐
地者也如牙厚一寸三分寸之二之說此以意推之
非經之正文皆有所不取

榑其漆內而中誦之以為之轂長以其長為之圍

先鄭云榑兩漆之內相距之尺寸也舊注云牙厚一

寸三分寸之二餘二寸分於內外面故各一寸是六尺有六寸之輪漆內六尺四寸此說無所據若謂牙厚一寸三分寸之二便為漆內則非矣既曰漆內安可便似牙厚計之漆內之制未明則較長三尺二寸圍徑一尺三分寸之二亦非也今以經之文意推之除不漆其踐地者只據漆者三寸三分寸之二則兩面為七寸三分寸之一兼上輪崇六分之五為五尺五寸是漆內共得六尺二寸三分寸之一中誦之為

三尺一寸三十分寸之五此轂之長也亦所以為圍
以其圍之防稍其轂

稍除也防三分之一也轂謂壺中衆輻所趨之地而
容輻蓄者也老子曰三十輻共一轂當其無有車之
用注無有謂空虛轂中空虛輪得行以一轂之圍得
三尺一寸三十分寸之五而為三十輻之所湊苟轂
孔稍廣則轂之力弱而有不勝任之患故三分其圍
而除一為數圍三尺一寸三十分寸之五以此三分

之三尺得一尺尚餘一寸三十分寸之五以一寸為三十分又三之為九十分以三十分寸之五為十五分共得一百五分之三十分之一則為三十五分是藪之制得一尺九十分寸之三十五藪中大小穿皆以金錮其內而貫輻焉

五分其藪之長去一以為賢去三以為軹

上經言藪空壺中此言藪之大小兩頭也賢大穿也軹小穿也藪長三尺一寸三十分寸之五圍三徑一

則圍三尺者得徑一尺尚餘一寸三十分寸之五以一寸為三十分又三之為九十分又以五分三之為十五分共得一百五分之三十五是較之徑亦得一尺九十分寸之三十五與數相稱焉五分去一以為賢以一尺五分而去一得八寸以九十分寸之三十五而三之為二百七十分寸之一百五五分去一則得二百七十分寸之八十四是賢徑為八寸二百七十分寸之八十四去三以為軼則半賢之

數是軹徑為四寸二百七十分寸之四十二然賢徑
倍於軹則大穿為太大鄭氏疑其誤以去一宜為去
二理或然也然則大穿去五分轂長之二亦得六寸
二百七十分寸之六十三

容轂必直陳篆必正施膠必厚施筋必數疇必負幹既
摩革色青白謂之轂之善

容者形容也如凡為甲必先為容是已容轂不直則
非利轉之勢故必欲其直篆者轂約也采以約之謂

之篆如詩所謂約軼是已較之有約以待施筋施膠
慢革之用苟或不正則憊何以負幹故必欲其正篆
既正矣然後施膠以附麗之則必欲其厚施筋以固
結之則必欲其數然後憊以慢轂則必欲廉之外見
而負於幹是以轂革相應而無羸不足之患五者固
必欲其善而古人猶為未焉慢轂必將漆之先以骨
丸之待乾乃以石摩之其色青白則為善之徵故曰
轂之善

參分其轂長二在外一在內以置其輻

上經皆論制轂此以下詳言輻之制鄭氏謂轂長三尺二寸者令輻廣三寸半則輻內九寸半輻外一尺九寸且經文既言三分轂長則當復除輻廣三寸半謂轂長三尺二寸亦未為當今以經之文意攷之則知轂長三尺一寸三十分寸之五以三尺言之二在外則得二尺矣尚餘一寸三十分寸之五以一寸為三十分又三之為九十分又以五分三之為十五分

共為一百五分是二在外者得二尺九十分寸之七十其一在內者得一尺九十分寸之三十五於二在外一在內之中而置輻焉

凡輻量其鑿深以為輻廣輻廣而鑿淺則是以大抗雖有良工莫之能固鑿深而輻小則是固有餘而強不足也故竢其幅廣以為之弱則雖有重任輹不折

鑿深者言輹之深足以受輻之入也輻廣者言輻之廣足以稱輹之所受也注云輻廣三寸半量其鑿深

以為輻廣則鑿深亦三寸半兩者相應則其固足以
相任反是則非輻之善矣輻廣而鑿淺鑿不應於輻
也則定以大杙雖有良工莫之能固杙言其動搖之
甚也鑿深而輻小輻不應於鑿也則是固有餘而強
不足固有餘言鑿之深強不足言輻之小也善為輪
者必竑其輻廣以為之弱則其力相稱而足以任重
竑言度其廣狹也弱蓄也輻入轂中者也度其輻廣
以為之蓄則雖有重任轂不折矣

參分其轂之長而殺其一則雖有深泥亦弗之濂也參分其股圍去一以為骹圍

參分其轂之長而殺其一者鄭氏曰假令輻除入轂之中其外長三尺則殺一尺以向牙其尺寸之長特假其說以言之此不必泥然凡為輻近轂則欲豐而近牙則欲殺牙所以行地於近骹而殺其參分之則向下利而泥弗黏也蓋輻近轂曰股入轂曰蓄近牙曰骹入牙曰蚤在股則豐若人之髀股在骹則殺若

人脰近足之骹以輻三分之長殺一以向牙以股三分之圍去一以為骹圍則大小稱矣

揉輻必齊平沈必均直以指牙牙得則無槩而固不得則有槩必足見也

水火無心之物也古人善用之而已揉輻以火所以齊曲直沈輻以水所以均輕重齊曲直者取其易直也均輕重者取其肉稱也然輻直則為倨牙曲則為句輻牙雖有倨句至於鑿內必正正則直以指牙而

與牙相得故無用於槩而自固不得則雖用槩以固然輪搖動則槩出而足見矣

六尺有六寸之輪綆參分寸之二謂之輪之固

綆輪草也鑿牙之時其孔向外侵三分寸之二使輻骹外單則車行不掉是謂輪之固

凡為輪行澤者欲杼行山者欲侔杼以行澤則是刀以割塗也是故塗不附侔以行山則是搏以行石也是故輪雖敝不甑於鑿

為輪有常制用之於平地者也行山行澤而拘乎常
制則遇險必僨遇坎必蹶矣故或損或益而從其宜
焉行澤者以薄為利故欲杼杼言削薄其踐地者則
是刀以割塗而塗不附山石地也行山者以厚為利
故欲侔侔言上下之適等則是搏以行石雖石齧之
而不能動其鑿此古人備物致用而深得夫變通之
宜者也

凡揉牙外不廉而內不挫旁不腫謂之用火之善

火剛而善變故制器者資之以揉物若曰揉輻必齊則曲者直焉若曰以火養其陰而齊諸其陽則柔者堅焉揉牙亦然順其自然之性而已或逆其性則外廉而絕理內損而挫折旁腫負而起惟巧者無此三患是謂用火之善

是故規之以眡其圓也萬之以眡其匡也縣之以眡其輻之直也水之以眡其平沈之均也量其藪以黍以眡其同也權之以眡其輕重之侔也故可規可萬可水可

縣可量可權也謂之國工

萬或作矩匡或作方此又總括輪人一篇之意大抵
注目而視方圓不如付諸規矩之為公謄口而議平
直不如付諸準繩之為審援手而度多寡輕重不如
付諸權量之為當六者設則天下之為方圓平直多
寡輕重者皆不能外是固不容加毫末於其間者也
故可規可萬可水可縣可量可權也謂之國工也固
宜非特百工之事為然凡成順利於天下者亦此理

而已矣

輪人為蓋達常圍三寸程圍倍之六寸信其程圍以為部廣部廣六寸部長二尺程長倍之四尺者二十分寸之一謂之枚部尊一枚弓鑿廣四枚鑿上二枚鑿下四枚鑿深二寸有半下直二枚鑿端一枚

蓋取乎圓輪亦取乎圓蓋以二十八弓而湊於部輪以三十輻而湊於轂類相似也故以輪人為蓋蓋之為制上為部中為達常下為程非部無以納弓於其

旁非程無以含達常於其中蓋達常小於程而程小於部所謂達常圍三寸程圍倍之六寸不言可知也信其程圍之六寸以為部廣之六寸不言可知也部長二尺程長倍之四尺者二為八尺亦不言可知也若十分寸之一謂之枚則枚為一分部尊一枚則蓋斗之上穹然而高者一分也弓鑿廣四枚則鑿孔之廣所以容弓者四分也鑿上二枚以其在上無所受而不用力故二分也鑿下四枚以其在下有所受而

用力為多故四分也鑿深二寸有半上言部廣六寸
達常圍三寸則達常入部其徑一寸是達常兩畔猶
有五寸則鑿深二寸有半正合兩畔五寸之數而弓
鑿不侵達常也下直二枚者謂鑿下四分弓入鑿而
曲二分則下直二分也鑿端一枚則鑿之狹一分也
夫一枚為一分部廣六寸圍三之則尺有八寸其數
十過百八十分而止弓鑿四分而二十八弓已占一
百一十二分外止於六十八分則部中實少而虛多

又以弓鑿一百一十二分其深各二寸有半而共湊於達常一寸之徑其數似不相合然古人深察物理上下相制自然堅固縝密而非常工之所能測識者矣

弓長六尺謂之庇軹五尺謂之庇輪四尺謂之庇軫

軹轂末也輪崇與車廣同輿廣六尺有六寸並兩軹六尺二寸三分寸之一總一丈二尺八寸三分寸之一又以乘輿七寸為軌故旁軌內七寸則減尺四寸

入輿下其餘一大一尺四寸三分寸之一也故六尺之弓倍之加部廣六寸凡丈二尺六寸又有宇曲之減則止可以覆軹若輪之廣則又小於軹軫之廣則又小於輪而弓之庇亦以一尺為差故五尺謂之庇輪四尺謂之庇軹

參分弓長而揉其一參分其股圍去一以為蚤圍

蓋弓近部者謂之尊近外而長則為宇曲三分弓長而揉其一則六尺之弓揉而為宇曲者二尺矣參分

弓長以一為尊則六尺之弓平而近部者亦二尺矣
近部謂之股猶輻近轂之為股也宇曲之末謂之蚤
猶輻入牙謂之蚤也股欲大蚤欲細三分其股圍去
一以為蚤圍以弓鑿廣四分而方圍之則股圍一寸
六分去其一以為蚤圍則蚤一寸十五分寸之一蚤
圍在末而股圍近部謂之尊則與部尊同

參分弓長以其一為之尊上欲尊而宇欲卑上尊而宇卑
則吐水疾而雷遠蓋已崇則難為門也蓋已卑是蔽目

也是故蓋崇十尺良蓋弗冒弗絃殷畝而馳不隊謂之國工

上欲尊謂近部之二尺也宇欲卑謂下為宇曲之四尺也蓋程并達常一丈故宇曲之四尺者垂二尺部上高則其勢隆宇下卑則其勢俯此所以吐水疾而雷遠也至於蓋崇十尺其中正也謂以宇二尺并人長八尺則於十尺為稱過乎十尺則蓋已崇而難為門不及乎十尺則蓋已卑而反以蔽人之目是以蓋

之崇必十尺古之所謂良蓋者不以衣覆之故曰弗
冒不以絲繫之故曰弗絃如是平敵而馳有殷其震
地之聲宜若墜矣而不墜是弓之入於部者固而不
可搖也故謂之國工與輪人為輪之國工同

